

**Naalakkersuinikkut ingerlatsisut partiit  
naatsorsuutaasa tamanut saqqummiunneqartarneri  
pillugit Inatsisartut inatsisaata  
allanngortinneqarneranik Inatsisartut inatsisaat  
(Naalakkersuinikkut sulinermut inunnit  
inatsisilerinikkullu inuttut isigineqarsinnaasunit  
tapiissutiniq pissarsisarneq pillugu  
paasissutissiisussaataitanerup sakkortusineqarnera,  
kinaassutsimik isertuussilluni nunanillu allanit  
tapiissutiniq tunineqartarnermik inerteqquteqarneq,  
tapiissutit annertussusiinut killigititat)**

**§ 1**

Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaanni nr. 15-imi 22. november 2011-meersumi tulluuttut allanngortinneqassapput:

**1.** Inatsisartut inatsisaata qulequtaa imatut oqaasertalerneqassaaq:

”Naalakkersuinikkut suliniaqatigiiffiit, partiit, naatsorsuutaasa tamanut saqqummiunneqartarneri naalakkersuinikkullu sulinermut inuit inatsisilerinikkullu inuttut isigineqarsinnaasut tapiissutaat pillugit Inatsisartut inatsisaat”

**2.** § 1, imm. 1, oqaaseqatigiit siulliit, imatut oqaasertalerneqassapput:

”Partiit Folketingimut Inatsisartunulluunniit Kalaallit Nunaanni qinersinermi kingullermi qinigassanngortitaqarsimasut qaammatisiutit ukiui tamaasa partiip nuna tamakkerlugu kattuffiata isertitaanut aningaasartuutaanullu ukiumoortumik naatsorsuutiniq kukkunerisiukkanik saqqummiussaqtassapput.”

**3.** § 1, imm. 1, nr. 3 imatut oqaasertalerneqassaaq:

“3) Qulaani taaneqartut saniatigut inuinnarnit tapiissutit allat.”

**4.** § 1, imm. 1, nr. 4, imatut oqaasertalerneqassaaq:

" 4) Inatsisilerinikkut inuttut isigineqarsinnaasunit, taakkununga ilanngullugit ataatsimut kattuffinnit namminersortunit, sulianut atatillugu suliniaqatigiiffinnit, inuussutissarsiortut suliniaqatigiiffinit, inuussutissarsiutigalugu suliffeqarfinnit, aningaasaateqarfinnit peqatigiiffinnillu, tapiissutit."

5. § 1, imm. 2, imatut oqaasertalerneqassaaq:

" Imm. 2. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsisimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput, tapiissuteqartumit tapiissutit tamarmiusut nalunaarlugit."

6. § 1-imi imm. 2-p kingornanut immikkoortutut nutaatut ilanngunneqassaaq:

" Imm. 3. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 4-mut ilaatinneqartunik pissarsiaqarsimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput, tapiissuteqartumit tapiissutit tamarmiusut nalunaarlugit."

Imm. 3-4 tamatuma kingorna imm. 4-5-inngussapput.

7. § 1, imm. 4, imm. 5-inngortussaq, imatut oqaasertalerneqassaaq:

" Imm. 5. Ukiumoortumik naatsorsuutit ilassutitut nassuiaammik paasissutissaajunnartunik partiip nuna tamakkerlugu kattuffiata § 4 aamma § 4 a malillugit pissarsiarisimasaaq imaqassapput."

8. § 4, nr. 2, imatut oqaasertalerneqassaaq:

"2) Tapiissutit ataasiakkaat annertussusii, tapiissuteqartup aqqa najugaalu nalunaarlugit:

- a) immikkoortortaqarfik tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsiaqarsimappat, imaluunniit
- b) immikkoortortaqarfik tapiissutinik § 1, nr. 4-mut ilaatinneqartunik pissarsiaqarsimappat."

9. § 4, nr. 3-4, atuukkunnaarsinneqassapput.

10. § 4-p kingornanut immikkoortutut nutaatut ilanngunneqassaaq:

*"Ilaasortat qinigassanngortissimasullu paasissutissiisussaataitanerat*

**§ 4 a.** Partiimut § 1, imm.1-imut ilaatinneqartumut ilaasortaq naalakkersuinikkut sulinerminut allanit parteerinngisaminit tapiissutinik, ilaatigut qineqqusaarnermut tapiissutinik, qaammatisiutit ukiuanni pissarsiaqarsimappat, ilaasortaq qaammatisiutit ukiuata naanerata kingorna qaammatit sisamat qaangiutsinnagit uku pillugit partiip nuna tamakkerlugu kattuffianut paasissutissanik nassiussaqaassaaq:

1) tapiissutit tamarmiullutik annertussusii, aamma

2) tapiissutit ataasiakkaat annertussusii, tapiissuteqartut aqqi najugaallu nalunaarlugit:

- a) ilaasortaq tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsiaqarsimappat, imaluunniit
- b) ilaasortaq tapiissutinik § 1, nr. 4-mut ilaatinneqartunik pissarsiaqarsimappat.

*Imm. 2.* Inuit partiimut ilaasortaanngikkaluarlutik Folketingimut Inatsisartunulluunniit qinersinermi kingullermi partii sinnerlugu qinigassanngortissimasut ilaasortatut isigineqassapput.

*Kinaassutsimik isertuussilluni tapiissutit nunanillu allanit tapiissuteqartunit tapiissutit*

**§ 4 b.** Partiit, najukkani inuusuttunullu immikkoortorta qarfiit ilanngullugit, nunanit allanit kinaassutsimilluunniit isertuussilluni tapiissuteqartunit tapiissutinik § 1. imm. 1, nr. 3-4-mut ilaatinneqartunik pissarsiaqarsinnaatitaanngillat. Nunanit allanit tapiissuteqartutut paasineqassapput tapiissuteqartut Kalaallit Nunaata avataani najugaqarlutilluunniit angerlarsimaffillit. Nunanit allanit tapiissuteqartunit tapiissutinik pissarsiaqarsinnaatitaannginnermut partiinit kunneqarfimmi nalunaarsorneqarsimasunit tapiissutit ilaatinneqanngillat.

*Imm. 2.* Partiit, najukkani inuusuttunullu immikkoortorta qarfiit ilanngullugit, tapiissutinik imm. 1-imi taaneqartunik tunineqarpata, partiip tapiissutit pissarsiarineqarnerinit sapaatit akunnerisa sisamat qaangiutinnginnerini tapiissutit utertissavaat. Tapiissutit utertinneqarsinnaanngitsut nunatta karsianut nakkartinneqassapput, pissarsiarineqarnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

*Imm. 3.* Imm. 1 aamma 2 taamaaqataanik ukununga atuutissapput:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunnut Folketingimut Inatsisartunulluunniit qinersinissamut aggersumut qinigassanngortissimasunut.”

*Tapiissutinut pissarsiarineqarsinnaasunut killiliussat*

**§ 4 c.** Partii qaammatisiutit ukiuanni ataatsimi tapiissutinik § 1, imm. 1, nr. 3-4-mut ilaatinneqartunik katillugit 200.000 kr.-init sinnilinnik, imaluunniit tapiissuteqartut ataasiakkaat eqqarsaatigalugit 20.000 kr.-init sinnilinnik, pissarsiaqarsinnaatitaanngillat.

*Imm. 2.* Partii tapiissutinut pissarsiarineqarsinnaasunut killiliussaq imm. 1-imi taaneqartoq sipporlugu pissarsippat, tapiissutit pissarsiarineqarnerisa kingorna sapaatit akunneri sisamat qaangiutsinnagit tapiissutit ilaat sipporuttut partiip utertissavai. Tapiissutit ilaat sipporuttut utertinneqarsinnaanngitsut nunatta karsianut nakkartinneqassapput, pissarsiarineqarnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

**11. § 5,** imm. 1, imatut oqaasertalerneqassaaq:

” Tulliuttunut akiliisitaanermik pineqaatissiisoqarsinnaavoq:

- 1) § 2-mik, § 3-mi oqaaseqatigiit siulliannik, § 4-mik, § 4 a-mik, § 4 b, imm. 2-mik aamma § 4 c, imm. 2-mik unioqqutitsinermut,
- 2) §§-it 1, 4 aamma 4 a malillugit paasissutissanik eqqunngitsunik amigartunilluunniit tunniussaqaarnermut, aamma
- 3) § 2 malillugu eqqunngitsumik nalunaaruteqaarnermut.”

**12. § 5-imi** imm. 3-4-tut ilanngunneqassapput:

” Imm. 3. Akiliisitsissutit imm. 1-2 malillugit aalajangersarneqartut nunatta karsianut nakkartinneqartassapput.

Imm. 4. § 4 b, imm. 2-mik aamma § 4 c, imm. 2-mik unioqqutitsisoqartillugu Kalaallit Nunaanni pinerluttulerinermi inatsimmi malittarisassat malillugit arsaarinnittoqarsinnaavoq. Arsaarinnissutit nunatta karsianut iluaqutissanngortinneqassapput.”

## § 2

Inatsisartut inatsisaat Inatsisartut inatsisaata tamanut nalunaarutigineqarnerata aqaguani atuutilissaaq.

Imm. 2. § 1, nr. 5, 6 aamma 8 kiisalu § 4a, § 1, nr. 10-kkut ilanngunneqartoq, siullermik atuutilissapput tapiissutinut ukiumi naatsorsuuteqarfiusumi 2025-mi pissarsiarineqartunut.

*Namminersorlutik Oqartussat, ulloq 4. februar 2025*

**Múte Bourup Egede (atsior.)**

Naalakkersuisut Siulittaasuat

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut